

ՀՀ Արմավիրի մարզպետ Համբարձում Մաթևոսյանի խոսքը տարեմուտի առթիվ

30.12.2020

Արմավիրի մարզի հարգելի՛ բնակիչներ, սիրելի՛ հայրենակիցներ,

Հայ ժողովուրդն ապրում է իր պատմության դժվարին ժամանակաշրջանները մեկը, երբ կորոնավիրուսային համավարակին զուգորդած Արցախյան երրորդ պատերազմը խլեց հազարավոր լուսավոր կյանքեր ու մեր պատմական Հայրենիքի զգալի մասը:

Այսօր չափազանց շատ են մեր երկրի առջև ծառայած խնդիրներն ու մարտահրավերները: Սակայն դարերի ընթացքում հայն իր անկոտրում կամքով բազմիցս կարողացել է իր մեջ ուժ գտնել և հաղթահարել պատուհասած փորձությունները, շտկել ճակատագրի հուժկու հարվածից կորացած մեջքը և շարունակել ապրել ու արարել:

Հարգելի՛ հայրենակիցներ, այս համատարած ցավին պետք է հաջորդի համախմբումը, միասնաբար ու համակարգված աշխատանքը՝ ի շահ մեր Հայրենիքի և ի հիշատակ մեր հայրենանվեր քաջերի: Չէ՞ որ մենք՝ հայերս, ունենք ազգային մի հատկանիշ. դժվար կացությունից դուրս գալու հույս ենք գտնում, իսկ ողբերգությունից՝ մխիթարություն:

Ինչ խոսք, մենք երբեք չենք մոռանա այն, ինչ ապրեցինք 2020-ին: Այն իր անջնջելի հետքը թողեց մեր պատմության էջերում և մեր հոգիներում: Բայց և եկեք ընդունենք, որ կյանքը շարունակվում է: Եվ մենք՝ ապրողներս, պետք է մեր ապրած ամեն օրով արժանին մատուցենք մեր հերոս նահատակներին և մեր Հայրենիքին:

Ուստի եկեք 2021 թվականը սկսենք նոր հույսերով և նորոգ հավատով: Եվ նոր տարում հանդուրժողականությունն ու կամեցողությունը դարձնենք մեր կյանքի ուղեկիցն ու կարգախոսը: Եվ հավատացած եղեք, որ այս պարագայում մեր ցանկալի հաջողություններն իսկապես անխուսափելի կդառնան:

Թող 2021-ին մայրական օրհնանքն ու հայրենի հողի սատար ուժը նեցուկ լինեն սահմանին կանգնած մեր զինվորին, ու թող մեր սահմանը պահող հայորդիներն ապահով և անփորձանք վերադառնան տուն: Իսկ հայրենի հողի պաշտպանության համար նահատակված մեր քաջարի հերոսները թող հանգչեն խաղաղությամբ: Խունկ ու խոնարհում նրանց հիշատակին:

Հարատևություն, խաղաղություն ու բարեկեցություն մեր Հայրենիքին:

Աստված պահապան Հայոց հողին ու ժողովրդին:

Հարգանքով՝ Արմավիրի մարզպետ Համբարձում Մաթևոսյան